

8. Circa S. Liturgiam humiliter propono ut ritus Consecrationis Ecclesiarum et Altarium fixorum breviores fiant, ita ut fideles eis adsistere possint sine gravi incommodo.

✠ ADELCHIS ALBANESI
Episcopus Viterbiensis et Tuscanensis
Abbas S. Martini ad Ciminum

244

Exc.MI P. D. ALBINI LUCIANI
Episcopi Victoriensis Venetorum (Vittorio Veneto)

Victoriae Venetorum, die 25 augusti 1959

Eminentissime Domine,

Omni sinceritate et reverentia Tibi subiicio vota ac desideria quae, intuitu futuri Concilii Oecumenici, Tuis Litteris diei 18 iunii 1959 n. I C/59-1460 summa benignitate a me petis exponi.

A) *Circa Doctrinam* mihi videtur:

1. Iterum affirmanda specialis natura magisterii ecclesiastici et obligatorietas pro fidelibus inde profluens ad sentiendi volenti animo sive decretis doctrinalibus sive praedicationi ordinariae.

2. Perpendendum quibus efficacibus mediis tradatur doctrina christiana fidelibus adultis, qui saepe ignorant res fidei elementares.

3. Thema optimismi christiani sublineandum contra diffusum pessimismum, hinc: contra relativistas validitas rationis humanae ad veritatem et certitudinem adipiscendam; contra individualistas et subiectivitas capacitas liberae voluntatis praedominandi super vires psychologicae inferiores suboscure.

4. In brevi sermone de rebus socialibus insinuetur, ut qui catholici in campo syndacali et politico militant numquam obliviscantur res spirituales praevalere super oeconomicas, exercitium vero caritatis ipsam defensionem iurium socialium sociare debere.

5. Denuo tradantur rectae doctrinae circa finem primum matrimonii, malitiam onanismi, foecundationem artificialem, partum indolorem, analgesin, therapeuticam psycanalyticam, reanimationem et similes quaestiones hodie valde agitatae.

B) *Circa disciplinam, opto:*

1. Concedantur Ordinariis expeditiores facultates in conferendis et tollendis paroeciis: immutentur proinde normae concursus, collationis, privationis, pensionis; auferatur — debitibus compensationibus — ius patronatus.

2. Iisdem parum expeditiores dentur facultates in re oeconomico-administrativa.

3. Prudentibus quibusdam normis traditis occurratur animarum necessitatibus meliori et uniformiori cleri distributione.

4. Ad simpliciores formas reducatur ritus synodus dioeceseanae.

5. Religiosi, etiam exempti, non solum principio, sed concretis prudentibusque normis, in iis quae animarum curam spectant, loci Ordinariis subdantur.

6. Superioribus maioribus religiosorum detur, ut, ex iusta causa, possint prorogare gubernium superiorum domorum ultra secundum triennium; hoc praesertim ad utilitatem hospitalis vel scholae, quae domui adnexa est.

7. Pareatur codificatio legum liturgicarum, quae conservet et defendat venerabiles antiquitates, linguam latinam, et simul nonnihil sanae modernitati concedat.

8. Censurae ecclesiasticae simplificentur quoad speciem et numerum, ut consonent modernis temporibus et studium confessorum faciliorent.

Haec pro meo modulo sentiens, occasionem nanciscor meam devotionem Tibi profitendi et me ad osculum Sacrae Purpurae provolvendi, dum subsignor

obsq. mus

✠ ALBINUS LUCIANI
Episcopus Victoriensis Venetorum

245

Exc. MI P. D. MARINI BERGONZINI
Episcopi Volaterrani (Volterra)

28 augusti 1959

Eminentissime Princeps,

Mitto tibi responsiones quas a me petisti circa argumenta in futuro Concilio Oecumenico tractanda.

Rebus attente perpensis, en argumenta de quibus agendum est, ut mea fert humilis opinio: